

四庫全書

史部

欽定四庫全書

史部

江南通志卷三十四

詳校官給事中臣丁雲錦

檢討臣德生覆勘

總校官編修臣王燕緒

校對官編修臣勵守謙

謄錄監生臣李元位

欽定四庫全書

江南通志卷三十四

輿地志

古蹟

五

安徽寧池四府

安慶府

宜城即今懷寧縣治宋景定元年始築宜城建康  
志云宜城者雁汊對岸一要害處吳魏相拒時嘗  
築城於此其後方言訛疑為宜一云晉郭璞謂此

處宜城故呼為宜城今有宜城渡在府西康濟門外為南北渡江要津又東門外有宜城鎮

呂蒙城在府東二里臨江相傳呂蒙所築今為故倉地

樅陽城在桐城縣東南一百二十里左傳文公十二年楚子孔執舒子及宗子遂圍巢杜註宗國名羣舒之屬即樅陽也漢置縣晉陶侃傳云初領樅陽令而志無此縣蓋嘗復此而尋廢也梁復置樅

陽郡今有樅陽上下鎮

魯鎮城在桐城縣七十里吳魯肅屯兵於此

呂蒙城在桐城縣東南相傳呂蒙所築按此非府城東之呂蒙城也

同安城在桐城縣東門外隋大業九年築

山城一名山焦城在桐城縣東南即唐移置同安縣處地多猛虎毒蛇元和中縣令韓震焚雞草木其害遂除

連城在桐城縣東南一百二十里唐書張儉傳儉  
祖威封皖郡父植封連城即此

六兒城在桐城縣南十五里明初黃榮六所築

孔城在桐城縣東三十里宋史李顯忠傳顯忠破  
敵於孔城即此

懷寧故城今潛山縣治古皖國晉置懷寧縣

安樂故城在潛山縣南二十里唐置於古武功城  
內武功城梁天監時大將武會所築也

梅城故城在潛山縣北唐置於龍鳴城內龍鳴城  
齊天統三年行臺右丞盧潛屯兵所築時龍鳴城  
中移軍在外因號龍鳴城

皖陽故城在潛山縣北二十二里其城居皖水之  
北故名

連塘城在望江縣茗山下委土為塹周二里四門  
相傳劉裕與盧循戰處遺壘尚存

古桐國在桐城縣北左傳云定公二年桐叛楚杜

註曰桐小國世屬於楚舒縣西南有桐鄉是

陰安廢縣在桐城縣東南八十里本漢魏郡屬縣  
劉宋時僑置於此

呂亭廢縣在桐城縣東北劉宋時以豫部蠻民與  
太湖縣同置今置驛

皖城故縣在潛山縣北唐武德五年析懷寧縣置  
皖城安樂梅城皖陽四縣按縣皖陽故縣府志云  
今之皖口鎮即舊皖陽也



太湖廢縣在太湖縣東北二里即今東嶽廟劉宋  
初置在龍山太湖水之側元嘉末移就平原去舊  
縣三十八里

東陳廢縣在太湖縣東四十里北齊置

青城廢縣在太湖縣東四十里魏曹仁所築唐武  
德四年置縣於此今名上格城

荊陽廢縣在太湖縣東四十五里唐武德間置

松滋廢縣在宿松縣北五十里漢始元五年封六

安共王子霸為松滋侯國於此

雨社在宿松縣西十里漢縣令張何丹禱雨處

同安監在潛山縣東八十里熙寧八年置鑄錢

正氣樓在府正觀門外余忠宣闕廟左山阜

四望樓在府治東登眺四望江山風景舉在目中

中江樓在府鎮海門外江許

天柱閣在舊郡圃久廢明郡守胡纘宗創建於正

觀門外江許登閣西望天柱巋然

太子閣在潛山縣天柱寺相傳昭明讀書處

潛峯閣在潛山縣境內王安石通判時讀書處

擢秀閣在潛山縣北五里宋陳瑩中嘗於此讀書  
後擢第黃庭堅因以擢秀名閣

天開圖畫亭在府學後枕山面江為郡佳勝元余  
闕有詩

紫玻瓈亭在府城雙蓮寺後明劉若宰讀書處夢  
神以紫玻瓈授之因以名亭

惜陰亭在桐城縣樅陽鎮陶侃為樅陽令曰大禹  
惜寸陰我輩當惜分陰故名

達觀亭在桐城縣樅陽鎮宋黃庭堅讀書於此

石亭在潛山縣東北三國志云魏揚州牧曹休侵  
皖吳將陸遜等敗休於石亭是也

涪翁亭在潛山縣山谷寺中以黃庭堅得名又有  
涪翁書臺

止泓亭在太湖縣白雲山海會寺宋嘉定趙容之

辨明嘉靖二年寺僧得石刻曰止泓復建此亭

對酌亭在宿松縣南臺山李白與閻丘舉杯邀月  
處又清風亭在縣東郭外三里李白贈閻丘詩有  
一朝風化清之句因以名之

廉泉亭在望江縣西四十里廉泉之上

超然臺在府治東北雙蓮寺右元虞集有詩

射蛟臺在桐城縣樅陽鎮漢書紀云武帝南巡登  
天柱山自潯陽浮江射蛟江中獲之薄樅陽而出

作盛唐樅陽之歌

祭臺在潛山縣皖山麓漢武帝祭嶽處

仙人臺在潛山縣白鹿巖東北廣五丈上有仙人足跡又有一臺在金鍾潭上

舒王臺在潛山縣治南宋王安石讀書處安石後封舒王因以名臺

天樂臺在潛山縣明劉若實渡石梁踞天池鼓琴聞空中奏天樂有異禽千數從天柱飛來音同笙磬

煉丹臺在太湖縣香茗山晉梅福煉丹於此

焚身臺在太湖縣登明山僧法寶禱雨不應遂焚身即得雨嘗有燈光見其處

分經臺在宿松縣北五十里有石高百餘丈梁昭明太子分金剛經於此宋嘉泰間建法華亭

讀書臺在宿松縣南三里唐李白至宿松依邑宰閻丘築臺讀書於此

釣魚臺在宿松縣陳漢山溪傍相傳張果老垂釣

於此

三至堂在府治東宋元豐間楊希元建其祖淳化  
中守皖父天聖中為通判至希元凡三至郡故名  
大節堂即今府堂元郡守韓建拒盜保城余闕作  
大節堂記

九帶堂在桐城縣浮山會勝巖上宋僧法遠垂帶  
示衆處

靜山堂在潛山治內舊郡堂也宋王安石詩皖城



終歲靜於山因名

雲會堂在潛山縣真源宮宋寧宗慶元五年建

左真人仙堂在潛山縣真源宮唐寶歷二年建開  
成五年張虛白撰記

二祖禪堂在太湖縣與司空山近

太白讀書堂在望江縣西十八里值雪山李白避  
地于匡廬司空問往來雷池值雪因築室讀書今  
遺址尚存

三孝堂在望江縣治北元至正中建為孟宗王祥  
徐仲源也後改為祠

二良書院在府治東為文翁朱邑建

禹江書院在宿松縣治西明郡守李遜講學處

慈湖書院在望江縣慈湖坂元王幼學讀書講道  
於此著有綱目集覽別號慈湖

蓮花書院在望江縣小茗山漢梅福曾避地於此  
至唐羅隱復來居之洞竈遺址尚存

喬家故井在潛山縣彰法山麓漢末喬公居此二女皆國色孫策克皖娶大喬周瑜娶小喬二女以殘脂粉投井中至今井水有脂粉色

孟宗宅在望江縣西北即泣竹生笋處又有泣竹臺在城內三孝祠後

西溪館在潛山縣城西唐刺史呂渭喜舒州山水於城西設館覽一州之勝

英輔齋在潛山縣太平寺東宋王珪讀書處

萬松山房在府西門外宋馮京讀書處

青山石屋在桐城縣城中晉裴仙人修煉處

龍眠山莊在桐城縣龍眠山宋李公麟居此嘗自  
繪山莊圖蘇轍有龍眠山二十詠山側為

國朝大學士張英賜金園

松壑別墅在潛山縣撥蒿坂宋處士金良貴棲隱  
之所白雲舊里在府城正觀門外宋白雲守端禪  
師於此悟道

昭賢里在望江縣北八里唐徐仲源事母以孝聞  
母卒遇雷雨輒伏墓側呼號德宗勅號所居里曰  
昭賢鄉曰孝感於墓傍築孝義墩白華軒今墩尚  
存

順孫里在望江縣涼泉明嘉靖間龍涌事祖母以  
孝聞詔樹慈順坊於其里故名

子貢嶺在府西五十里子貢遊楚停驂於此

逢龍山在府西北余闕讌董僉憲詩所云雁沒逢

龍山是也三國志臧霸傳云吳將韓當逆霸霸與戰於逢龍山還屯舒即此

晉陵坂在府大豐鄉獨山之下有大阜隱隆若釜即陵也不知何代嘗有人開田見石門遂止旁壘壘者皆疑塚

長風沙在府東六十里即李白長干行內所指也亦名長風城齊吳子陽與豫州刺史戰於此宋周湛充江淮制置使謂長風沙最險者石牌灣鑿河

十里避之

皖口在府西唐李涉遇盜投詩處

將軍冲在府北門外元余闕引江水通五濠三塹  
屯兵於此以拒偽漢

藤墩在府東城內舊有大樹覆墩垂藤如織

石牛洞在潛山縣山谷寺西大石如牛眠旁有蹄  
跡黃庭堅嘗讀書石上李公麟為之繪圖又有石  
牛精舍在山谷寺中

酒島在潛山縣山谷寺前有石島色殷紅如赤玉  
清流映徹光彩絢爛如霞潛山十景之最也

鱸溪在潛山縣吳塘魏武帝行軍至潛忽思鱸膾  
左慈取銅盤釣之得數十尾武帝釋其半於溪時  
正暮春今惟柳絮飛時有之謂之楊花鱖

大雷戍即今望江縣治晉時置陳為大雷郡隋改今名  
盡忠池在府西門外即清水塘元余闕死此  
雲池在潛山縣真源宮東池中嘗起五色雲



卧冰池在望江縣埠南岸相傳晉王祥避地時卧冰於此後雖寒永不冰

木鷺洲去桐城縣百二十里南唐與周世宗割江為界以木鷺浮江中隨所之以定南北鷺乃循洲入小峽而下

六百丈在桐城縣東二百里樊若水乘小舟載絲繩以度江之廣狹此處闊六百丈云

令公潭在潛山縣東門漢末邴令公與妻陸氏同

死難於此

桃花潭在宿松縣城西上河口

龍潭在望江縣南二里即唐鞠信陵沉石禱雨處  
釣魚磯在太湖縣龍山崖下水中有石刻磨滅不  
可盡辨中有云波光映照肝膽寒嵐氣逼人毛髮  
立府志云邑人以沙水洗苔蘚知為倪德元作

仙田在宿松縣北即西漢松滋縣治匡阜真人修  
煉於此後張何丹為令時有嘉禾無種自生故名

風節井在府城按察使署後余闕妻盡節於此  
天泉井在桐城縣南城內明末流寇圍城城中渴  
甚有小兒戲掘一井泉忽天湧因連掘十餘穴  
皆湧泉全城賴以存活

夢井在潛山縣真源宮前唐明皇嘗夢遊此因賜  
名中使王越宿題詩有馮誰借問崑前叟曾托吾  
皇一夢來之句

西源九井在宿松縣西源山自麓至巔九井如貫

惟第七井在山半峭壁旱時捫蘿而上得水急返  
雨輒至

讓泉在府西門外泉極清冽汲者爭則竭讓則涌  
錫泉在潛山縣梁寶誌公卓錫得泉處

鶴泉在潛山縣白鶴道人止處鶴起泉流

山谷流泉在潛山縣山谷寺佛殿後有黃庭堅題  
額始為流泉後以石甃周圍澄泓不流名曰摩圍  
泉庭堅最愛飲之遂自號摩圍老人

雙螭泉在潛山縣西北皖山頂明慈禪師所住庵  
掘地見雙螭躍出泉輒湧

望湖石在桐城縣西門外黃庭堅讀書處

詩崖石在潛山縣吳塘水南水激石如漱玉十景  
之一也

碁盤石在太湖縣良埠灣梅福與仙奕此石上  
傳衣石在太湖縣司空山二祖慧可傳衣與三祖  
處又有葫蘆石相傳二祖祕記存焉

憇錫石在宿松縣西南五里佛坐嶺五祖偶坐此  
欲卓錫於此聞龍湖水腥吟曰生平不愛魚池水  
風動波聲也帶腥遂飛錫去又且記石在巖恭山  
五祖愛其幽勝欲建道場於此良久曰此處有千  
年山而無千年水乃抱一巨石置之曰且記此  
石鏡在府城西北懸石丈餘光明如鑑

鐵牛在府城江濱多水怪初建城時冶鐵鎮五處  
集賢門內一盛唐門內一山川壇東一天柱閣右

一萬億倉一時有聞喘聲者驚其異稱為鐵牛大將軍

飛來鐘在府雙蓮寺有大鐘浮江而下寺僧迎之遂止六鐘宋文帝元嘉七年帝將征闕洛潛山有鐘十二聲發地中山崩六鐘自出制合古式聲中律呂上有古文一百六十字

鶴駕在潛山縣城外宋元豐間每歲仲春有鶴數千羣蔽天而來回翔飛舞於空張春遊潛見之作

鶴駕詞

徽州府

毛甘故城在歙縣烏聊山後漢末毛甘萬戶屯於此吳將賀齊平之

徽州新城在今府城溪北三里宋宣和三年築新城於此因民不便仍還舊城即今府治南畿志云今故址盡為民居

故城門在休寧縣有六府志云東迎春在淳化巷



首西忠孝在惠政橋南班政在古樓巷北松蘿在  
鶴山巷北東南救寧西南美俗遺址尚存

婺源故城在婺源縣北二十五里唐開元中分休  
寧縣置中和二年楊行密將陶雅守歙暴橫縣人  
汪武據弦高鎮以拒之後縣治因而不改即今治  
也其故城改為清化鎮

梅銷城在祁門縣西十五里銷吳芮將項羽封銷  
十萬戶侯邑於此

廣德故城在黔縣東漢置寰宇記云有舊城在今縣東五里

越國公城在績溪縣登源唐初汪華起義時築此歸德廢縣在歙縣西南五十里唐永泰五年析置按唐志在休寧而寰宇記在歙境相接也

海陽廢縣舊治休寧縣西二里靈烏山尋移治縣東十三里萬安山上本歙縣地孫吳析置休陽縣後改海陽府志云萬安山下有兩村曰上舊市下

舊市

國朝改市為墅知府陳玉題上舊墅曰海陽故址

黎陽廢縣在休寧縣西北晉置今為黎陽鄉

祁門故址在今祁門縣西元和志云縣東至歙州

一百七十九里本古昌門地漢黟縣之南境唐永

泰元年方清於此偽置昌門縣刺史長孫全緒討

平之恥其舊號以縣東北二里有祁山因改祁門

梁安縣即今績溪縣梁大同初析歙縣置今縣南

有良安鄉蓋梁安之訛也

貢院在府城府志云宋乾道四年於大成殿東因餘地而益拓之設貢院選士明年登第者十人內有為禮部第一廷試第三者

越國公府在休寧縣萬安山舊稱汪王故宮汪華所居宋為廣惠王廟

紫翠樓在府治宋宣和間建

御書樓在府槐塘宋丞相程元鳳建

梅花初月樓在府石門明學士朱升建太祖御書  
梅花初月四字顏之

羅顛樓在府西新安山水志云樓跨黃羅天馬間  
樓前小山外見黃羅如錐顛露秀刺天際天馬蜿  
蟠右翼彷彿百雉翠光冉冉撲樓中兩山如在几  
席前也

溪山第一樓在婺源縣城中羣山環其前大溪走  
其下元馬肅建程文記

望烏樓在祁門縣二都唐郎中廖嵩自閩避亂來  
祁攜二烏卜居至此烏棲不去遂家焉其裔孫德  
湊為建望烏樓

擁青樓在祁門縣治宋景定中建以杜甫高山擁  
縣青句為名

虛直樓在祁門縣桃峯下宋謝昇建其子璉講學  
其中種竹十竿故名

雪峯樓在績溪縣西石壁山上宋崔鷗建

景蘇樓在績溪縣署舊為秋風堂宋紹興間邑宰  
曹訓摹前令蘇轍遺像及所為詩鐫於石建樓貯  
之曰景蘇

宸奎閣在府城紫陽書院內因宋理宗御書建閣  
春草閣在府松明山明汪道昆讀書處

侯賢亭在府問政山唐刺史于德晦為兄方外建  
披雲亭在府南山唐宣歙副使魏弘簡建見柳子  
文集及文苑英華

歲寒亭在歙縣治舊名松風亭宋令王薦建府志云元紫陽書院山長張炳購於趙評事家得其地以歸學明正統間立亭

浮丘亭在郡治西北雉堞上有兩古木宋郡守洪适倚木建亭范成大有詩又浮丘園在浮丘山下古梅十里許

秋水亭在休寧縣治宋令葛勝仲濬深池築亭其中府志云



國朝縣令廖騰燧重建加廣焉又縣治西有真意亭亦  
葛所建

還金亭在休寧縣霞阜河畔為商山吳清還金建  
有碑記

環綠亭在婺源縣儒學山右宋汪子英建元胡炳  
文記

流芳亭在婺源縣西二十里宋江大正建

時雨亭在婺源縣石龜潭上元達魯噶齊諾海禱

雨輒應因建此亭自為記

翠睂亭在績溪縣西亭前小山相對如睂宋蘇轍嘗遊焉謂似其鄉之睂山故名後即亭為蘇轍祠豁然亭在績溪縣治宋汪琛建蘇轍有詩

世德亭在績溪縣南邑人為明尚書胡松建

孝感亭在績溪縣治北明縣令高梁為孝子許欽建

鼓吹臺在府篁墩湖側程篁墩記云忠壯公靈洗

習戰時所築數傳後風雨之夕猶聞鼓吹聲

百花臺在府西三里宋司農汪叔詹築

富登釣臺在府富登渡一石出江上勢欲飛入江  
中元鄭玉嘗釣於此平章余闕篆書鄭公釣臺四  
字於石玉自為記

李白釣臺在黟縣東南十六里西連墨嶺一名尋  
陽臺

黃山堂在府治後唐大中初建舊有黃山樓北望

天都蓮花諸峯森秀天表後為堂于德晦有詩

舍蓋堂在府治後宋洪适建以延四方往來之士

范成大記

相儒堂在府城南門內宋程元鳳讀書處寶祐中  
州守趙汝嶧建府志云後廢碑刻移砌大成殿牆  
左

中山書堂在祁門縣南明汪克寬與弟時中肄業  
之所

程忠壯宅在府西三十里仁愛鄉宅有大樹號千年木立祠其下篁墩湖濱礫石尚存為一方勝蹟黃孝子宅在府西九里黃屯園唐孝子黃芑故居貞元中詔旌其門今稱孝仁里

汪華故宅在休寧縣西門內柳塘坊

凌唐佐宅在休寧縣救寧門南凌家巷

共學齋在休寧縣東山元儒趙沔講學所

尊德性齋在婺源縣環溪宋程洵建初名道問學

朱子易之復為銘

屏山書屋在婺源縣翠屏山朱子歸省祖墓時所  
建十世孫穩復結屋讀書於此

環佩重來軒在府之槐里宋丞相程元鳳有琴曰  
環佩亡去已久其六世孫文貫復購得之為軒以  
藏焉

風泉雲壑軒在府南門紫陽書院宋郡守韓補建  
元方回記

新安道院在休寧縣治東宋令祝禹圭建 附朱熹

記休寧大夫信安祝侯汝玉以書來曰休寧之為邑雖有難治之名而吾之為之已再歲矣始也不能不以人言為慮中乃意其不然而今則遂有以信其果不然也蓋其封域實鄆山之左麓而漸江出焉山峭厲而水清激故東其氣食其土以有生者其性情習尚不能不過剛而喜鬪然而君子則務以其剛為高行奇節而尤以不義為羞故其俗難以力服而易以理勝苟吾之所為者出於公論之所是則雖或拂於其私而卒不取以為非也以是吾之始至蓋不能無不說者而今則雖然無與為異吾常用於事之不勝其繁而今則廓然無事之可為也吾將更葺廳事之東參采賓佐屬詠之什而榜之以新安道院子能為我記之則後之君子益知所以為治而無吾始者之慮矣予惟汝

王之為此可以見其政之成民之服而官曹之無事矣然道之得名正以人所共由之路而非無事之謂也夫以汝王之始至坐於堂皇之上則左簿書右法律日夜苦心勞力而不得休其或少暇則又不免衝寒風冒烈日以出入乎阡陌之中而不暇怠凡所以勸民之善而懲其惡興民之利而除其害者非有道以行之則何以致今日之無事哉顧其名此乃若專取乎今日之無事而返病前日之勤事為非道耶抑常計之天下之事雖有動靜勞逸之殊而所謂道者則無彼此精粗之間汝王之學固有以知此矣彼其所以喜於政成之無事而不避異學之淫名豈非朝夕之間猶欲從容於此以深思前日之已行而益求其所未至卒以究夫無彼此精粗之間者而大發於功名事業之間乎子故邦人且汝玉子舊也樂其意為書本末以示來者使於此邦之俗賢宰之志尚有考云



新城園唐咸通六年於歙州城西北為堤以禦水  
光化中增築為新城其後堤漸圯每為溪水泛溢  
因棄為桑野名曰新城園

朱家巷在府西南黃墩朱子自叙茶院譜後云先

世居歙之黃墩

附

朱熹婺源茶院朱氏世譜序

熹聞

之先君子太史吏部府君曰吾家先世居歙州歙  
縣之黃墩相傳望出吳郡秋祭率用魚鼈唐天祐  
中陶雅為歙州刺史初克婺源乃命吾祖領兵三  
千戍之是為制置茶院府君卒葬連同子孫因家  
焉生三子事南唐補常侍丞其後亦有散居他郡  
者熹按今連同別有朱氏舊不通譜近年乃有自

言為茶院昆弟之後者猶有南唐補牒亦當時鎮  
戍將校也蓋其是非不可考矣先吏部於茶院為  
八世孫宣和始官建之政和而葬承事府君於  
其邑遂為建人於今六十年而熹抱孫馬則居閩  
四世矣淳熙丙申熹還故里將展連同之墓則與  
方夫人十五公馮夫人之墓皆已失之因亟詢訪  
得連同兆域所在乃率族人言於有司而後得之  
其文據藏於家副在族弟然而三墓者則遂不可  
復見癸卯五月辛卯因閱舊譜感世次之易遠骨  
肉之易疎而墳墓之不易保也乃更為序次定為  
婺源茶院朱氏世譜而并書其後如此仍錄一通  
以示族人十一世以下來者未艾徽建二族自今  
每歲當以新收名數更相告語而附益之庶千里  
之外兩書如一傳之永遠有以不忘宗族之誼至  
於蘆村府君其墓益遠居故里者尤當以時相率  
展省更力求訪三墓所在而表識之以塞子孫之

賁而熹之曾大父王橋府君無他子其墓在故里者時有薄田於其下得以奉守不廢當質諸有司以為祭田使後之子

孫雖貧無得鬻云

五城務在休寧縣南五城水上舊為大鎮有五城斜隅相對旁有大墳有人發之其墳上鐵厚二尺鐵纜破雷雨晦冥人懼而止元置五城務明初廢吳山里在婺源縣東七十五里勾踐滅吳流夫差二子其長子鴻死此因葬焉遂名吳山里又名婺源女里

朱文公闕里在婺源縣南朱子先世故居元時知州于文傳建朱子家廟中有韋齋井相傳文公生時井中紫氣現亦曰虹井明宣德中建亭其上附

明汪敬虹井亭記

虹井亭者記闕里虹井亭也記井甃自闕邑而有虹則自朱晦

菴父子始自井有虹而婺之文明闕豈惟婺之文明闕宇宙之文明實闕今之宇宙揭聖經於中天而雲漢為昭者誰之功與語有之天降時雨山川出雲夫雨也而雲先則文明也而虹兆理又奚疑載考之古尼父制孝經既成而告備於北斗有赤虹自天而下化為黃玉尼父拜而受之夫孝經何與於北斗而天之降精若是其與春秋成而麟出同一徵應乃或者謂麟出為非時故仲尼春秋因

之以作又謂尼父以為吾道不行之兆因之絕二  
百四十二年之筆獨胡氏以河出圖洛出書及籒  
韶作而鳳凰儀常之謂其先後天弗違其說始章  
明而有據正大而非誇彼欲逃之乎微應之說者  
蓋皆求其故而不得者也若然則一聖一賢其生  
關乎天地其立言也關乎機祥毋惑乎集大成者  
先後若同堂也井在故宅之右氣潛與龍井相通  
可供千家之汲寒冽冰齒人多啜不噎又能已疾  
龍井之間龍嘗噓氣盤結如雲其深不可測此則  
垂綆不踰二仞往來井井其坎常盈自虹出而泉  
日減蓋精騰於天而氣竭於地理無足怪然人不  
敢以為舊為泥棄之必曰此瑞井也宣德九年錢  
塘陳侯以太學高等選為婺源縣令晉謁闕里拜  
瞻遺像以為仲尼之後一人因用其學為政政成  
而百廢具舉修學宮葺書閣文公之祠因以次及  
圮者修之款者搆之朽者新之徘徊於虹井之上

懼其久而汚也為亭以覆護以甃垣平以文石垣為四戶限其流之旁入者俾汚潔屏而寒泉注顏其楹曰虹井亭人之過而瞻者於以知晦翁之上應天精下稟地靈而侯且命敬曰子盍為記之使後人葺俾勿壞敬因復曰睢渙之水錯繡若麗壺頭之泉淑蘭成氣漱英噴華呈祥表異聖道汪洋如水行地前有河洛後有洙泗淵淵虹泉同源共清我侯濬之澤存萬世侯曰其然庶無甕敵乃磨貞石而刻之

僕城里在黟縣西十八里林歷山下漢末陳僕等屯此故名

孔靈村在府南三十里晉永嘉之世孔愉避地居

此信著鄉里後忽捨去人皆以為神人

任公村在府北四十里梁太守任昉行春至富資溪上樂之徘徊累日人號其溪曰昉溪溪傍村曰昉村唐大中初刺史盧藩易曰任公村

舒村在府西四十里中鵠鄉村旁有讀書墩南唐進士舒雅所居府志云隔溪山石望之峩然若纓其冠者曰幞頭石

斷石村在休寧縣西南三里懸崖絕壁巨石墜下

如臺狀宋治平中知縣事呂大防書斷石二字於  
上今稱落星臺祥符經云昔有兩舟泊崑下一祭  
一否石隕不祭者舟

張村在祁門縣西十里唐左金吾天將軍金華張  
志和隱此自號烟波釣徒因名

大徽村在績溪縣改州為徽取此

漢洞在府仁愛鄉外狹中寬有饜臼遺跡相傳漢  
末郡人避兵於此



仙巖在婺源縣壁月門外相傳宋時有人掛竹連環於杖頭至巖倏不見始悟竹環為呂字且其貌與洞賓類遂塑像建觀祀之

譙貴谷在黟縣輿地紀勝云在縣南方輿勝覽謂在縣北昔土人入山行七日至一穴豁然周三十里中有十餘家又云按縣圖有潛村至今數十家同一村或謂之小桃源三說不同

放生池在府城西宋紹興十三年詔天下郡各為

池放生於足鑿城西孺地以應詔後郡守童僅增  
廣之作恩波堂及好生魚樂之亭

萬貫洲在婺源縣鵠溪宋岳飛征楊么屯兵於此  
朱塘在婺源縣東朱子還婺源與門人滕璘遊見  
其山水幽靜俱如疇昔夢中所見問其地對曰朱  
緋塘璘世業也朱子曰故與子有神交者在因命  
作亭為書草堂二字貽之

五畬驛在休寧縣南二十五里又縣南二十九里

有皇華驛原名憇賢驛俱元置明初廢

魚亭驛在黟縣東三十五里宋置呂本中詩云竹  
密如雲不見天好山無數簇溪田只應黟縣溪山  
勝盡在魚亭驛舍前

衝山營在婺源縣治西北五代時吳將劉津所置  
今有壁壘餘址

胡僕射營在祁門縣義城都福洲及歸仁都等處  
皆唐末胡瞳屯軍之所

管界寨在府西百八十里又深渡寨在府南四十  
五里俱宋置明初嘗置巡司

程灃寨在休寧縣南東密嶺唐乾符五年黃巢寇  
郡郡人程灃率義兵立寨於此以拒之今塹壘猶  
在相傳上有元帥府基下有落箭丘皆以灃得名  
舉嶺寨在休寧縣東北十五里天寶岩又縣東南  
方山有白際嶺寨縣西婺源界有塔嶺寨又縣西  
吳田嶺上有馬金寨縣西南溪口有松陽寨皆宋

置元廢

中平寨在婺源縣東九十里宋置明初廢今為往來孔道

西坑寨在績溪縣東六十里元置又置鎮守軍營於此明初改置巡司戍守正統初廢

蝦蟆坑在府鎮安門外俗訛為麻坑

階坑在府東北二十里方輿志云吳廢太子和所居階迹猶存

浣沙埠在府龍井山北相傳李白訪許宣平至埠  
上一翁對曰門前一竿竹便是許公家白帳望翁  
已失所在蓋翁即宣平也

石羊阡在休寧縣東鄉吳王楊行密疑塚也南畿  
志云世傳吳太子葬東山今不知所在惟兩石羊  
夾道有翁仲石趺存

獨母柴在黟縣南十五里俗傳昔有寡婦死無以  
葬行人覆之以薪至今人經行其處皆以一枝草

投之

殷公井在府南羅城內井底有斜穴一通銅井潭  
一通釜井潭每井有遺物多於二潭得之

少保井在府城內唐少保薛稷所鑿明一通志云  
一名九井

唐均勝井在黟縣東二十五里天井山麓歲旱禱  
雨俄而滿井霖雨隨注

聖泉在休寧縣孫田葉巖下相傳明高帝訪汪巽

元馬蹠所觸遂成泉

兌卦石在休寧縣古城山麓宋淳熙間縣令鄒補之摩崖隸書兌卦於其上

產龍石在黟縣東山石燕洞之下其石剝然兩開各有首尾鱗爪相傳龍孕石中石破而龍出

白玉大士在黟縣石門山洞石如玉肖觀音大士像

慈孝松在府龍山元至元丙子鮑宗巖遇盜縛大



松下其子壽孫願身代不聽倏烈風震變盜恐軼  
去得免明永樂中旌其村為慈孝里松曰慈孝松  
楠樹在休寧縣西白嶽山大數十圍諸石如伏犀  
馴象山志云江左楠木惟此一株今枯雕為神像

### 寧國府

楚王城府志云在城北百里黃池鎮南相傳吳楚  
相距時築又有故楚城在南湖北岸

遂道城府志云在城北四十里南畿志云在府東

北六十里本漢縣屬九江郡晉末僑立於蕪湖縣  
界屬淮南郡

溫城在府東二十里唐刺史溫璋築

宣城故城在南陵縣東四十里青弋江上漢縣屬  
丹陽郡建安二十年孫權使蔣欽屯宣城即故城  
也

甘公城在南陵縣北七里或曰吳將甘寧嘗屯此  
或曰晉內史甘卓治郡時築俗訛為甘羅城

南陵故城在南陵縣西北梁置南陵縣治赭圻城

赭圻城在

見太平府

吳故城在涇縣西南五十里落星潭東俗稱沙城  
宋志云三國吳置水經注云晉太康元年分宛陵  
置今有安吳市及安吳渡

桓公城舊通志云在涇縣東四十里烏溪嶺南畿  
志云在桓公嶺下晉桓彝討蘇峻築此

走馬城在涇縣南四十里晉桓彝將俞縱屯兵處

又有蘭石在縣東六十里桓公嶺西桓彝使俞縱  
守蘭石即此

白龜城在涇縣東北柏山下隋末左難當欲築城  
拒輔公柝會溇暑大雪有白龜印雪周行隨跡築  
城故名又有幘山軍壘在縣東北三里亦難當拒  
公柝所築

猷州城在涇縣西三十里大寧山前唐武德間置  
明一統志載入石埭以晉時兩縣俱隸宣城郡也

寧國故城在今寧國縣南十三里三國吳置

懷安城在寧國縣東南百里明一統志謂縣南四十里誤吳大帝分宛陵置

烏石城在寧國縣南九十里盤山北相傳南唐時置以備吳越

丹陽郡治漢宛陵縣即今宣城縣其城晉內史桓彝所築今府治東北有鐵牛門即彝所築子城故址也

南陽廢縣在旌德縣西北梁置屬宣城郡

仙壇在宣城縣麻姑山最高峯舊有丹竈劍池石  
碁枰釣魚磯天游亭諸勝跡世傳麻姑煉丹處  
雙鯉塔在太平縣西九十里弦歌鄉高可丈許搖  
之輒動終不仆下臨大溪溪有二石狀如鯉與水  
浮沉雖漲不沒故名

北樓在府治北南齊宣城守謝朓建唐李白詩誰  
念北樓上臨風懷謝公亦名謝公樓明郡守方逢

時記云自唐獨孤霖改建疊嶂樓而北樓之名廢

矣附 宋田錫疊嶂樓賦

宛陵之丘玄暉舊遊城連  
延兮百雉世綿歷兮千秋

流水白雲慨依然在覽遺風往事信赫若兮長  
留余以丹陛策名皇華奉使適莅於此乘春以至  
驛梅江柳動遊宦之芳懷風觀露臺起高明之逸  
意疊嶂居先登之悅焉憑落絮之危檻向飛花之  
晚天複嶺連岡峙昭亭兮作鎮平蕪遠樹引句水  
兮為川因而覽古興懷臨高凝睇自春秋戰國之  
後至吳魏鼎分之際干戈偕王乘輿擬帝斯為形  
勝之地恃以控臨之勢襟帶三江咽喉五湖歸句  
踐兮稱越隸夫差兮曰吳比奕棋之靡定惟霸畧  
兮能圖方今禹迹重新堯封復古銜王命於北闕  
詠皇風於南浦升高而賦憐宋玉之才多覽景自  
怡非仲宣之思若江渺渺兮涵春草萋萋兮感人

指吳越之遠道介池歛兮為鄰兩漿何歸引迴眸  
於天際微雲似畫帶斜陽於水濱既而閱謝守之  
詩蒼苔滿石覽獨孤之文芳塵在壁杏花含露念  
昔我之來時菊蕊迎霜乃今余之暇日歲云豐稔  
民之悅逸思命儔兮  
嘯侶聊登樓兮自適

忠勤樓在府南門宕吳氏村口宋景定間吳淵置  
樓於丞相第中御書忠勤樓三字額賜之今祀吳  
柔勝吳淵吳潛三公於其上府志云明萬歷初改  
建

雲齊閣在府敬亭山翠雲庵前取唐李白詩合沓



與雲齊為名府志云

國朝郡守龔鯤重建

雙溪閣在府治後與疊嶂樓並宋治平中刁約建  
即唐初北望迎春閣故址文天祥有登雙溪閣詩  
識松閣在府城東舊府學中初相地者云百年後  
松梢過閣當有魁天下者至嘉定間吳潛果大魁  
因以名閣

風光閣在涇縣西賞溪上舊有亭宋紹興中縣令

魏杞改建閣取風光水西之句名之後為水嚙移  
縣治左

敬亭在府北十里敬亭山

謝公亭在府北郭外即謝朓送范雲之零陵處唐  
李白謝公亭詩謝公離別處風景每生愁

擁翠亭在府城北敬亭山即李白獨坐題詩處遺  
碣尚存

西候亭府志云未詳何地南畿志謂在府西郭外

宣城事函云唐天寶中宣州刺史趙悅建附唐李

白西候亭序

惟十有四載皇帝以歲之驕陽秋五不稔乃慎擇明牧恤南方凋枯伊四

月孟夏自淮陰遷我天水趙公作藩於宛陵祇明命也惟公代秉天憲作程南臺洪柯大本聿生懿

碩宜乎哉橫風霜之秀氣鬱王霸之奇畧初以鐵冠白笏佐我燕京威雄振肅敵不敢視而後鳴琴

二邦天下取則起草三省朝端有聲天子識而宰衡動聽殷南山之雷剖赤縣之劇強項不屈三州

所居大化咸列碑頌至於是邦也酌古以訓俗宣風以布和平心理人兵鎮惟靜畫一千里時無莠

言退公之暇清眺原隰以此郡東壘巨海西襟長江咽三英扼五嶺輞軒錯出無旬時而息焉出自

西郭蒼然古道道寬列樹行無清陰至有疾雷破山狂飈震竈炎則爍野秋霖灌途馬虺隤於谷口

人周章於山頂亭候靡設逢迎闕如自唐有天下  
作牧百數因循齷齪固恢永圖及公來思天萃前  
弊實相此土陟降觀之壯其迴岡龍盤沓嶺波起  
聲勢交至可以有作方農之隙廓如是營遂鐘崖  
埋卑駟石剪棘削污壤堦高隅以門以墉乃棟乃  
宇儉則不陋麗而不奢森沉閑闕燥濕有庇若鼇  
之湧如鵬斯崑縈流鏡轉涵映池底納遠海之餘  
清瀉蓮峯之積翠信一方雄勝之郊五馬踟躕之  
地也長史齊公光又人倫之師表司馬武公幼成  
衣冠之髦彥錄事參軍吳鎮宣城令崔欽令德之  
後良材間生縱風教之樂地出人倫之高格卓絕  
映古清明在躬僉謀群功不日而就然是役也伊  
二公之力歟過客沈吟以稱嘆邦人聚舞以相賀  
僉曰我趙公之亭也羣寮獻議請因謠頌以名之  
則必與謝公北亭同不朽矣白以為謝公德不及  
後世亭不留要衝無勿拜之言鮮登高之賦方之

今日我則過矣。敢詢耆老而作頌曰：耽耽高亭，趙公所營。如鼇背突兀於太清，如鵬翼開張而欲行。趙公來翔，有禮有章。煌煌鏘鏘，如文翁之堂。清風洋洋，永世不忘。

響山亭在府城東南二里。唐刺史路應跨潭為梁。

建兩亭於東西崖。權德輿為記。鐫崖石。附權德輿

記。元和二年冬十月，宣城長帥中執法襄陽郡王潞公作新亭。新營凡周月而厥功成。先是郡城

之南，坳陘磽确，山木不剪，樵門不開。公因暇日，觀視原野，直南一里，所得響山焉。兩崖聳峙，蒼翠對起。其南得響潭焉，清泚可鑿，滌迴澄淡。又其南則博敞平夷，澶漫逶迤，從古之際，地是邦之休利。目與心會，闡然自得。述以條陳，實蒙報可。乃量日力，計徒庸，闢於弇中，成是夷道。揭東西二亭於雙峯。

之上相距百步華軒峻宇皆據勝勢廣廈疏寮可  
樓灑氣碧山巨目清流在下跨以虹梁抵茲近郊  
因其爽塏乃列營署度野以步度堂以筵上棟下  
宇各有區處規地之廣袤分左右營部焉牙門新  
軍而下左至八右至七既而左次莽平采石之師  
與宴設堂又在廣場開館竚篠縈帶可以閱軍實  
可以容晏豆度美材則不費因悅使則不勞巽之  
申命師之畜衆楚莊之匏居衛文之楚邱得其時  
制而不煩也官業盡在於是爰初師所處在郡之  
北偏地泐塾下水泉沮洳積弊不遷介大病焉至  
是則修武備建長利興寢得安其室處坐起以觀  
其習變而公又饗士於斯娛賓於斯公之心大則  
神王神王則中和旁達士體寧則氣全氣全則餘  
勇可賈夫然則不出楹堦俎豆之間而威儀交修  
上下決洽在此物也以公之平粹淑均天資吏師  
昔嘗四部符一司武皆有利澤施於州壤及是則

貴為元侯疏以大封推心術而行千里所繇屬城  
而流於支邵程功底績觀發知智亭與營之制宜  
乎哉前賢之以循政聞者有矣而遺於是豈穰公  
之為而裕斯人也凡由此塗出者東南抵於歙西  
北抵於涇肩摩轂擊往復自便絕東谿有浮橋過  
西亭得蓮池觸類滋長皆為絕境公以鄙夫春秋  
之徒也繪而傳  
焉使實錄於石

沃洲亭在府城東十里玉山寺後宋時建取唐李  
白五松何清幽勝景美沃洲之句

環波亭在府城北濠上宋郡守邵飭命名梅堯臣  
有詩

景梅亭在府城南宋梅堯臣祠墓之左府志云知府范吉建

東峯亭在涇縣西劉遺民釣臺之側唐永泰中季廣琛討洞寇方清宴客於亭上適告捷御史中丞袁修賦詩刻石紀其事後裴丹於荆棘中得斷碑有袁修二字因名其石為袁石

烟雨亭在涇縣西寶勝寺前枕山面溪烟雲如畫六勸亭在太平縣南五里宋令周景賢以六事勸



民

嚴公臺在府西南四里相傳漢嚴光嘗垂釣於此  
宋梅堯臣詩有卜經嚴子臺句

劉遺民釣臺在涇縣水西寺左白雲潭上遺民嘗  
為柴桑令後棄官釣魚於此有石巋然下臨潭水  
琴高臺在涇縣北二十里琴溪高山之巔按列仙  
傳琴高在涿水此蘇耽也以其好鼓琴故以琴高  
名之

望霞臺在寧國縣西溪唐貞觀初建

歃血臺在旌德縣石柱山梁時程靈洗起兵討侯景築壇誓師於其上

海榴堂在府治唐時建許渾有陪崔尚書宴海榴堂詩

萬卷堂在寧國縣南屏山琴山間宋乾道中楊秉讀書處秉故人湯鵬舉入叅大政為印國子監書籍藏其中府志云又有玉書案石硯閣今廢

洪永章宅在涇縣舉山下相傳父老嘗得誥勅碑石上有銀青大夫兵部尚書兼上柱國賜紫金魚袋洪永章勒

虞璠宅在寧國縣南五里璠宋侍郎虞儔父也隱居於此

滕慶和宅即旌德縣會勝寺梁丞相滕慶和居此後捨宅為寺

黃顏石室在寧國縣黃顏山頂可容數百人相傳

晉永嘉中黃顏修煉於此

瞿硎石室在寧國縣文脊山中晉瞿硎先生隱居於此府志云山有門一名山門洞

宛溪館在府城東宛溪上後為宛陵公署唐李白詩吾憐宛溪好百尺照心明

高齋在府治內齊謝朓守宣城時建因麗陵陽山麓故名明郡守方逢時有重葺高齋記萬歷志謂以廉惠亭改建誤

韓昌黎別業舊址不可考朱子韓文考異云愈有別業在宣城集內示姪爽自京師之宣城詩有宣城去京國閣里故依然之句

南湖書墅在府城西四十里南碕湖上貢士萃美集云元廣陵侯濬置張養浩諸人題詠

羅隱墅在涇縣小溪唐羅隱居此旁有羅公祠

勇里在涇縣西北後漢建安中太史慈據涇縣孫策擊擒之勇里即此

蕃薇塢在旌德縣東宋狀元劉暉讀書於此

曲池在府城北三里唐裴休為宣州刺史時種蓮於此

甄塘在涇縣南二里世傳魏甄后所生處

裴公井在府敬亭山南唐裴休鑿色白味甘獨異他井

金鷄井在府城北廣教寺右唐黃蘗禪師建寺時有二金鷄相鬪入井輒泉湧莫測其源其材皆從

井湧出

孔子井在寧國縣南一百一十里即今孔夫關之地相傳孔子入吳時鑿又有孔子堂堂下有馬跑泉宋吳晦之詩試向荒祠尋舊蹟一泓堂下馬跑泉

磨崖碑在涇縣石礪洪頭山有石碑字多磨滅其可見者曰巍巍法宇聖德靈奇天仙作樂神人護持倚與居士博大能洽跡晦岩泉情存佛法挾黃

鶴仙帶白龍水清淨妙義靈寶至理唐天寶十四  
載癸巳四月壬申朔二十八日己亥刻石

巨人跡在旌德縣東鳧山又有馬蹄石搗藥白龍  
潭石相傳竇子明女化青鳧飛去在此

靈根石在府一峯山之巔唐李白題雲根二字至  
今塌摹者多

紫陽題石在太平縣長壽鄉獅山有平石丈餘朱  
子過訪孫覲題秀陰二字勒其上



奇石仙桃在旌德縣境去資福寺二十步許石澗有桃樹不花而實兵備使郝壁設亭於此

### 池州府

石城在府西七十里地名鐵店亦曰倉埠潭以東西兩石山夾河如城故名漢置縣

虎林城在府西六十五里孫吳時為戍守處大帝封其子休為琅琊王鎮虎林即此

胡城在銅陵縣東四十里凡八所相去二里許不

相連屬相傳古胡王神所築其地澗港皆以胡王  
為名一曰宋秦始中晉安王子勛舉兵江州其將  
劉胡引軍東下築此屯兵因名

石埭故城在石埭縣西一百四十里吳置石埭場  
梁大同中置縣以貴池源有兩小石埭堰溪水為  
名今名七里街

堯城舜城堯城在建德縣南四里舜城在建德縣  
北二十里舊傳兩帝南巡至此故名

臨城廢縣在青陽縣南五里吳赤烏中析陵陽石  
城二縣地置今為臨城鎮

定陵廢縣在青陽縣東北即今定陵鄉晉南渡後  
僑置

義安廢縣在銅陵縣東三十里唐高祖時分南陵  
縣置今為順安鎮

陵陽廢縣在石埭縣東北二里即猷州城漢置今  
為陵陽鎮

晉陽廢縣在東流縣東北即今晉陽鄉隋置

桑柘門在府城秀山門外虎山之東北通鯢口唐時城門名也又有雙江門未詳何所

仙壇在石埭縣陵陽山中峯之半竇子明仙所唐天寶未建仙壇宮至今祀之

醮壇在石埭縣碧玉泉上其石方平陞級如壇竇子明嘗醮其上俗呼為仙人石

梅根監在府東五十里亦曰梅根治六朝皆鼓鑄

於此劉宋秦始中陳慶攻張興世於錢溪不敢越  
乃於梅根立砦唐志云南陵縣有梅根鎮蓋其地  
舊屬南陵也宋至道三年以池州錢監為永豐監  
或曰即故梅根監

利國監在銅陵縣銅官山唐置銅官場宋置利國  
監後以銅乏廢

九華樓在府治九華門上唐刺史李元方建明一  
統志云即九峯樓也

蕭相樓在府城東南隅唐大歷中刺史蕭復建後  
杜牧重建名之曰蕭相樓宋蘇轍有詩

秋浦樓在府城東宋紹定戊子郡守趙葵因舊址  
增築有石刻蘇軾詞黃魯直字於壁南畿志云明  
正德戊寅知府何紹正重建

景蕭樓在府城內萬歷中柳林巷居人李春達掘  
得斷碑有景蕭樓上梁文宋狀元陳舜俞撰

順安樓在銅陵縣東三十里臨津舊驛中

賣花樓在建德縣南里許自唐至五代時有花樓  
二十四間土人善剪繡作花以市四方置酒會多  
至此市花諺云江南茶飯建德先知近樓名胭脂  
港亦舊管絃地今悉荒廢

文選閣在府西貯梁昭明文選處今僅存其址

芙蓉閣在李白書堂前

翠微亭在齊山之巔九華清溪秋浦皆隱隱屬望  
中唐時建宋岳飛詩經年塵土滿征衣得得尋芳

上翠微好水好山觀未足馬蹄催送月明歸又有  
三奇亭亭以石鼓洞仙人橋妙空崑為三奇故名  
又有青霄亭舊為觀郡樓宋王哲易今名

神交亭在府城小丘山明李呈祥講學地以遇湛

若水構亭曰神交

附

明湛若水神交亭記

池陽有高士古

源季子者謝太學隱居小丘山十餘年不出志聖  
賢之道聞甘泉子而慕焉然而未嘗識面甘泉亦  
未嘗識其面而知之賢而敬之曰神交矣或曰面  
不相識何謂神交甘泉子曰夫人皆識面淺者也  
而謂上下萬年識堯舜禹湯文武周公是何面目  
而若相知之深焉神交也故孔子夢周公高宗夢



傅說舜夢拜平丞黃帝夢遊華胥見堯羹牆皆心也神也神也者心之所為也故心之神也交通也通天而天通地而地通萬物而萬物通堯舜禹湯文武周孔而堯舜禹湯文武周孔感而通之一氣也氣也者通宇宙而一者也是故一體也一體故氤氳相通痛癢相關不交而交矣嘉靖丙午八月廿泉子過池陽登九華之山古源子出迓焉或曰子十年不為彼鄉士夫出矣不為郡大夫出矣而為甘泉子出何耶曰吾為道出也非為甘泉公也相見而懽若平生交焉若魚水不足也執弟子禮而學焉虔心以相孚神以相授不待口之相語也深矣何則神交至焉傾蓋次焉故知神之所為者可以盡心矣知心之所為者可以知性矣知心神之所為者可以語道矣盡心知性而存養之可與語學矣盡之矣古源子退而作神交亭甘泉子為次第其語作亭記甘泉子喟然嘆曰於平時知子

而知神交之道則斯亭斯記可兩忘矣

弄水亭在府治通遠門外舊橋之西杜牧建取李白欲弄水中月句為名

貴池亭在府城北五里磯上俗呼為望江亭唐杜牧詩勢比凌敲宋武臺

翠光亭在池口瀕江宋岳飛詩愛此倚欄干誰同  
寓目閒輕陰弄晴日秀色隱空山島嶼蕭騷外征  
帆杳靄間予雖江上老心羨白雲關

清溪亭在府清溪鎮又有清溪館

望華亭在九華山西圮橋之右舊名玩華亭馮叔

吉重建易今名領九華衆峯之妙

梅公亭在建德縣治後宋梅堯臣為令有惠政民

思之作此亭附元吳師道記

士君子宦遊之方去  
之數百年人猶想其

風烈而不忘至於崇表而章顯之是雖好德之心  
然其所以使人至此而為末俗之勸者豈小哉池  
之建德故宋尚書都官員外郎國子監直講梅公  
聖俞景祐間為知縣事集中詩幾百篇皆在是邑  
作而當時風物宦况之大畧可考見也後人嘗  
於官舍西偏為梅公堂以祀之既廢而令柴夢規

重建於縣圃之北世易事更復改縣後之半山亭  
為梅公亭以識其舊未幾亦化為荒墟師道之來  
也按行遺址見大礎在茅草中莧兒牧豎躑躅其  
上老木三數株錯立蒼然為之躊躇太息自是營  
構之念往來於懷越明年始克就緒為屋三間限  
以周垣鍵以外尙飛簷虛檻高亢疎明既與邑人  
慰其景仰之思而溪山屋室環繞映帶又得登臨  
之美以相樂也當宋之初文體卑陋公倡古淡之  
作一變其習歐陽子以一世巨人而盛推尊之若  
己弗及又以仁厚樂易溫恭謹質稱其人一時諸  
公交口論薦雖仕不大顯而文學行義足以儀當  
時而表後世矧建德聲邑自唐令長凡幾何人而  
公之名獨稱之至今是豈可以勢力致哉使凡吏  
於此者登公之亭誦公之詩思公之所樹立以自  
勵則斯邑之民將被其賜於無窮也師道於公無  
能為役然不可謂無志於自勵者斯亭之作既自

為之經營而衆來致助乃命邑人陶起東董其事  
不以煩民庶幾可久尚告來者嗣有葺焉其或迂  
吾之為漫不顧省任其圯壞泯滅亦獨何心哉亭  
成當至元三年丁丑之歲十二月乙亥明年某月

日記

菊江亭在東流縣西菊江門外舊有菊臺瀕大江  
後建樓其上名望江樓再易今名向於此祀陶潛  
故江曰菊江亭之名亦因此

繡春臺在齊山東巖之巔危檐傑棟巋然屹立宋  
魏了翁書繡春臺三字又有紫薇臺在竇雲岩後

因杜牧得名今存石刻數字

昭明釣臺有二一在鎮山下一在和龍山下有玉

龍潭

白鶴臺在青陽縣東南保寧觀相傳白鶴真人煉

丹處

釣魚臺在青陽縣九華山嘉魚池上相傳竇子明

李昭象垂釣處

李白書堂有五一在府南四十里桃陂一在府南

苦行嶺一在銅陵縣五松山一在石埭縣杉山又  
一在青陽縣九華山中宋吳夢祈記云翰林訪道  
江漢會故友韋仲堪宰是邑乃卜居焉其居介乎  
龍女泉之側嘉熙初蔡元龍訪其遺蹟於化城寺  
東偏復構斯堂

李昭象書堂在九華山翠羽池

杜荀鶴書堂在九華山東去小龍山三里許舊為

臨城地

范仲淹書堂在青陽縣東二十里讀山之陽

華岳宅在府南山川壇後岳為殿前司謀誅史彌遠遇害有手植松十餘株宅前石狻猊尚存

費冠鄉宅在九華山少微峯

吳用之宅在九華山西坂吳氏自唐以前居之號松陽宅

新城宅在蓮花峯西亦吳氏宅也唐刺史吳器高築新城精舍



楊梅館在府西九十里石嶺多楊梅唐白居易有  
楊梅館詩宋改為驛今呼為楊梅坦

龍堂精舍在銅陵縣五松山李白與南陵常贊府  
遊五松山詩有龍堂若可憇吾欲歸精修之句注  
云銅井西五里有古精舍

陳公園在銅陵縣東鰲首山園內有二池宋蘇軾  
黃庭堅曾遊此

葉公園在銅陵縣東五十里葉山下宋王安石遊

其園戲葉云週迴莫有千秋葉葉隨答云裨補能  
堪百節蠶

鐵船在銅陵縣五松山前湖田之下首尾船形如  
積鐵舊傳晉潯陽太守張寬歿為神於此一夕乘  
船至為人所見其船遂溺而露首尾焉

杏花村在府秀山門外里許因唐杜牧詩有牧童  
遙指杏花村得名南畿志云有古石井圈刻黃公  
廣潤玉泉六字

國朝郎遂有杏花村志

杜塢在府城西四里因杜牧得名其下有杜湖

閔源在九華山東巖由神光嶺南遶東巖外上中下凡三處皆產茗此閔茶所由名

桃源在建德縣南四十里步頭村水源深邃人跡罕至唐乾符中黃巢之亂邑人多避於此

石印池在建德縣石印山下宋周必大錄云縣北六里斷崖石壁之上有印文圓如馬蹄兩兩相對

舊傳許旌陽逐蛟至此所留也

流觴瀨在九華山百丈潭上有石渠唐李昭象與客泛觴於此

黃花驛在東流縣北以陶潛種菊之地故名又有菊所

鵲頭戍在銅陵縣鵲頭山六朝皆置戍

黃屯在府東南六十里唐乾符中黃巢常屯此因名有黃屯堰南畿志云東二百里石岡名鐵券

相傳唐賜巢鐵券處

三墩九曲在石埭縣後南畿志云墩有三以應三  
台水九曲以應九曜郭璞以厭火災

峽山寨在府西宋開寶七年曹彬伐江南拔峽山  
寨進克泗州是也

劉公寨在青陽縣南宋建炎中劉光世因險立寨  
禦張遇於此

丹井在青陽縣九華山北葛洪煉丹井也

金釵井在石埭縣西峨山之麓唐桂盛女畫節處  
白龜泉在青陽縣化城寺西龜山下蔣之奇題名  
石上

龍女泉在青陽縣東巖相傳金地藏卜居方苦遠  
汲俄有少女云石下有泉因以手撥石泉果湧出  
又有甘泉在東巖中峯下明嘉靖初湛若水講學  
於此後建書院旁有一泉公自署曰甘泉

舒姑泉在石埭縣南三十里蓋山下百步梁劉峻

書蓋山之泉聞弦歌而赴節相傳昔有舒氏女與其父析薪至此牽挽不動俄化為泉其母曰吾女性好音樂乃作弦歌泉涌迴流有朱鯉一雙云

金鷄石在府城西五十里埤雅云江南富姓者莊前一石月下忽作鷄聲遂名金鷄石

天柱石在石埭縣陵陽山唐李白所築

定城石在石埭縣前街中長一丈二尺廣五之一相傳郭璞遷縣立此石

石鏡在石埭縣櫟山其石縱橫二丈光明可鑑人  
物

鹿跡石在東流縣東六十里相傳葛洪跨白鹿仙  
去處



江南通志卷三十四



欽定四庫全書

史部

江南通志卷三十五  
六

詳校官給事中<sub>臣</sub>丁雲錦

檢討<sub>臣</sub>德生覆勘

總校官編修<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>李元位

欽定四庫全書

江南通志卷三十五

輿地志

古蹟

六

大廬城三府

太平府

丹陽故城在府城東五十里接江寧縣界秦置縣  
始皇東巡由丹陽至錢塘即此漢仍之屬丹陽郡  
謂小丹陽吳範從孫策下小丹陽是也今有丹陽

鎮陽亦作楊應劭曰丹陽以木名邦晉志云丹陽山多赤柳故名

姑孰城即今府治漢丹陽春穀二縣地東晉時置城戍守并積鹽米於此城南臨姑孰溪因名

謝公城在府采石鎮晉謝尚鎮牛渚時所築

却月城在府西南三十里天門山上南宋車騎將軍王元謨所築廣十餘里久廢

蕪湖故城在蕪湖縣東三十里古鳩茲地左傳襄

三年楚子重伐吳克鳩茲是也漢置蕪湖縣今縣東四十里有鳩茲港

王敦城在蕪湖縣東北一里羅氏園王敦鎮于湖時所築

南豫州城在縣東北一里金陵志云姑孰之南淮曲之陽晉成帝咸和四年僑立豫州治蕪湖即此宣城輿地紀畧云在蕪湖今邑東尚名宣春門殆晉時僑立

上黨郡城在燕湖縣西南五里晉太元間因上黨  
民南渡僑立上黨郡及襄垣縣

繁昌故城在繁昌縣西北四十里東晉僑置襄城  
郡割于湖為境并置繁昌縣屬焉寰宇記云繁昌  
本南陵縣地其地出石綠唐時為石綠場今為舊  
縣鎮又有襄城郡址在縣東北延載鄉

赭圻城在繁昌縣西南十里孫吳置赭圻屯晉哀  
帝召桓溫入朝至赭圻有詔止溫溫遂築城居此

今稱故縣城

南丹陽廢郡在當塗縣西北梁置

于湖廢縣在當塗縣南三十八里漢丹陽縣地三國吳為督農校尉治晉太康初始立于湖縣屬丹陽郡

春穀廢縣在繁昌縣西北漢置新志謂在蕪湖縣陶辛圩者誤按元和志寰宇記皆云在南陵縣境應入繁昌無疑

天門雙闕在府大信鎮宋大明七年帝西巡有雙  
爵盤旋下集繖蓋羣臣呼萬歲詔建雙闕

望江樓在當塗縣慈姥磯相傳梁昭明太子讀書  
處又縣東南淨居院亦有昭明讀書臺

太白樓在采石磯即太白祠唐元和中建陸龜蒙  
詩謝眺青山李白樓是也

清風樓在蕪湖縣驛山之陽因蘇軾清風閣舊額  
以命名

燃犀亭在當塗縣采石牛渚磯上晉溫嶠平蘇峻  
還鎮至此聞其下多怪燃犀燭之見水族奇形異  
狀夜夢人謂曰與君幽明道別何意相照後人因  
建亭於此

賞詠亭在采石驛前晉謝尚鎮采石月夜汎舟聞  
別艇詠詩邀與談論及旦知為袁宏薦於朝後人  
遂即亭名亭焉

白紵亭在當塗縣東七十五里昔宋帝與羣臣會



此唱白紵歌故名

姑孰亭在當塗姑孰溪上 附唐李白宴姑孰亭序

通驛公館南有水亭焉四甍翬飛巉絕浦嶼蓋有  
前攝令河東薛公棟而宇之今宰隴西李公明化  
開物成務又橫其梁而閣之晝鳴間琴夕玩清月  
蓋為接輿軒祖遠客之佳境也製置既久莫知何  
名司馬武公長材博古獨映方外因據胡牀岸憤  
嘯咏而謂前長史李公及諸公曰此亭跨姑孰之  
水可稱為姑孰亭焉嘉名勝槩自我作也且夫曹  
官紱冕者大賢處之若游青山卧白雲逍遙偃傲  
何適不可小才居之窘而自拘悄若桎梏則清風  
朗月河英嶽秀皆為棄物安得稱焉所以司馬南  
隣當文章之旗鼓翰林客卿揮辭鋒以戰勝名  
教樂地無非得俊之場也千載一時言詩紀志

捉月亭在采石鎮神霄宮內李白泛舟狂醉欲從  
水中捉月故名亦名暮雲亭相傳藏李白天宮錦處  
宋梅堯臣有詩

十詠亭在府城東唐李白有姑孰十詠因名蘇軾  
過此讀之笑為贗物見陸游入蜀記

百花頭上亭在府城外尼山巔宋景定五年太守  
鄭羽建

蛾眉亭在當塗縣北二十里據牛渚絕壁前直二

梁山夾江對峙如蛾眉然故名宋熙寧二年太守  
張瓌建

孟公亭在當塗縣官圩東岸宋咸淳八年大水知  
州孟知縉以身捍水水為之卻立亭表焉石刻尚  
存

思瑾亭即采石驛皇華亭以思周公瑾故名宋真  
德秀題額

江山好處亭在當塗縣北二十里蛾眉峯左亦名

觀瀾亭

附

明倪謙江山好處亭記

太平為郡在南  
京之南百里而

遠右枕江有山焉曰采石下有磯曰牛渚江自西  
南來合沅湘漢沔之水直走磯下姑孰之溪則自  
東折西而橫入於江驚湍駭浪晝夜衝鬪有聲磯  
之南直走天門東西二梁中束一水蒼翠修曲宛  
若蛾眉舊嘗為亭磯上以占其勝矣去蛾眉之左  
下坡數級地勢頗卑而坦迤幽曠山益近而奇江  
益近而駛其地尤勝有非蛾眉所得而擅者舊亦  
為亭於此名江山好處元監府鵝吉哩氏易名觀  
瀾歲久傾毀景泰三年豐城李侯若虛來守是郡  
政平訟理民安物阜嘗考尋遺迹以為是亭乃郡  
之絕景自昔騷人韻士若晉溫嶠袁宏謝尚唐李  
白崔宗之諸賢皆嘗於此登眺而吟嘯者也豈惟  
吾輩政餘可以藉是消煩而適意邦人歲時亦得  
以遂遊觀之樂也容可坐視其廢乎乃與同知任

能讓通判陳清推官何哀捐俸貲為倡命廣濟寺僧修惠蒙材重建亭成諸公與客携酒餽登而落之憑高遠望則烟嵐之杳靄雲濤之洶湧風帆沙鳥之往來長鯨巨鼉之出沒仙梵之廬漁樵之居舉接於欄檻之外千態萬貌景象無窮有以使人心開目明而神爽飛越於是揚袂引觴曰樂哉斯亭因復其名曰江山好處徵記於予予以花鳥本平時可娛之物也然感時恨別者見之適足以驚心而飛淚郡之江山信可樂矣使為守者政未能數於下為民者政未能安於上外有責於人內有媿於己則登亭也觸物興懷無非悲傷感慨之境孰見其為可樂哉今諸公涵煦休養措斯民於衽席而民親愛之不翅父母上下之間心孚惠洽蓋無適而非可樂者況目當江山之好處哉是宜樂其樂而使民同其樂也

亭之復古詎不宜乎

湖山烟雨亭在當塗縣東三里月盤山據郡城游  
觀之勝

夢日亭在蕪湖縣東一里故王敦城上晉大寧二  
年王敦將舉兵內向帝密知之微行至于湖察敦  
營壘而出敦正晝寢夢日環其城宋時於此建亭  
故名

玩鞭亭在蕪湖縣北二十里晉明帝微行察王敦  
營壘敦覺使五騎追之帝馳去見逆旅賣食媪以

七寶鞭與之曰後有騎來可以相示追者至問姬  
姬因以鞭示之五騎傳玩稽留遂久帝獲免因名  
亭碑石存

吳波亭在蕪湖縣西門外瀕大江宋隆興二年建  
張孝祥書額

志喜亭在蕪湖縣神山巔宋乾道七年秋禱雨於  
李衛公祠輒應因名

雄觀亭在蕪湖縣吉祥寺右山巔名觀瀾亭西向

吳仁傑易使面南

識舟亭在蕪湖縣鶴兒山俯瞰大江舊名八角亭  
王思任權關時易今名

凌歊臺在當塗縣西北黃山宋孝武帝築以避暑  
即宋行宮也面勢虛敞高出塵壒之表唐李白有  
詩

聯壁臺在采石山江干二石突兀中分一線石刻  
聯壁二大字



縹緲臺在繁昌縣後山巔下瞰大江前對濡須宋  
熙寧間易名表裏江山臺

誓清堂在當塗縣黃山祖逖渡江誓師於此宋嘉  
熙中吳淵建堂後陳瓘以米芾所書極目亭三字  
易之

揮塵堂在府治臨大池舊名近民吳淵重建易名  
盤龍齋在當塗縣南州津晉桓玄建齋畫龍於上  
後劉毅鎮此居之毅小字盤龍遂為符驗云

橫江館在采石對岸卽和州橫江李白所咏也

滴翠軒在蕪湖縣赭山廣濟院舊名檜軒有宋黃庭堅自書山谷讀書處五字

北園在繁昌縣寶山宋蔡確建

潘閣宅在府西今儒學是

郭祥正宅在府東街中有醉吟菴蘇軾過之題詩  
畫竹石於壁

陳規宅在府東街成賢坊

羅彥輔宅在府西街

張鏐宅在府城東南隅其居曰孝感坊

陶安宅在府城東街明太祖賜額及堂聯

謝朓宅在當塗縣青山一名青山館旁有謝公池

陸游入蜀記云青山市南有元暉故宅基環宅皆

青林文篠清泉奇石真佳處也今為保和菴

陶弘景宅在當塗縣橫望山今為澄心寺因話錄

云盧巖說隨鄭常侍遊宣州當塗隱居山巖即陶

貞白煉丹處也爐跡猶存

李白宅在當塗縣青山之麓白至姑孰依當塗令  
李陽冰愛謝家青山有終焉之志

周維長宅在當塗縣橫望山李白有贈橫山周處  
士詩

李陽冰宅在當塗縣青山陽冰解組後築室青山  
最深處重巒疊嶂佳趣萬種今名萬佳山

張孝祥宅在蕪湖縣西南昇仙橋有歸去來堂

張崇義居在繁昌縣城崇義自祖父以來千口同居閨閫肅然嘉祐中楊傑過其門書義居二字遺之

陵口戍在府北三十里或謂之東陵口晉咸和中蘇峻自歷陽濟橫江登牛渚軍於陵口胡氏曰在牛渚之東北亦江濱戍守處

南陵戍在繁昌縣西北下臨江渚六朝時江州東界盡於南陵蓋瀕江津要處也晉陶侃領荊州江

州刺史自南陵迄於白帝數千里路不拾遺謂此  
梁置南陵縣治赭圻城時此地亦置戍承聖初王  
僧辨討侯景軍於大雷遣前軍侯瑱襲南陵鵲頭  
二戍克之是也

九龍池在橫山頂有石坎容水僅斗許能不竭內  
石龍子九枚長數寸黝形高足癡不畏弄昔傳人  
取其一坎中仍九盡取之坎中亦九也

禁蛙池在蕪湖縣昇仙橋西張孝祥築堂成鄰人

以池內蛙鳴為讓孝祥取硯投之隨手聲絕

洗硯池在繁昌縣馬仁山唐王冲霄洗硯於此至  
今池水猶黑

九井在府城南十里晉桓溫所鑿殷仲文九日從  
桓溫游九井賦詩即此井通江已竭其五昔有墜  
鞭於井者從牛渚流出見杜滔北征記

龍泉寺井在府東龍泉山晉螺浮尊者卓錫開此  
以竹汲之則清冷可飲以繩汲之則泥滓渾濁

洞井宋孝武游姑孰勅謝莊攜其子朏從乃使為  
洞井贊朏即於坐奏之帝曰奇童也

謝公井在青山路南有磚甃謝朏鑿

陶弘景丹井在橫望山

唐井在府城東十五里禪岳寺山下闌石鑄元和  
十二年字

掛袍石在當塗縣白紵山西晉桓溫率賓僚燕飲  
醉時掛袍於此



丹竈在橫山陶弘景煉丹設也此地環天碧嶂景物奇特所謂丹竈寒烟及五井指此

石鼓在蕪湖縣石白湖側唐貞觀二年尉遲恭來治郡拜二石鼓以壯其門相傳是石季倫家物

### 廬州府

合肥故城在今縣北漢置三國時魏揚州都督滿寵以城臨江湖賊得據水為勢請立城西北三十里依險可固守謂之新城宋曹朋之記曰合肥入

斗度獨多故號金斗城亦曰金斗門今雞鳴山下  
有新城故址

逡道城在府東舊染縣南三十里清水橋後漢志  
云九江郡有逡道縣曹操伐吳屯兵於此重築之  
亦曰曹城晉成帝時僑立於蕪湖縣界

滁陽城在府東北寰宇記云在慎縣東北六十四  
里

小峴城在府東七十里南齊所築詳山川

赭城在縣西北唐光啓二年壽州刺史張翺遣兵寇廬州楊行密將田頔等敗之於赭城是也

梁縣城在府東北七十里漢汝南郡有慎縣劉宋僑置於此屬南汝陰郡宋紹興三十二年避諱改曰梁縣從舊郡名也今為梁縣鄉

舒縣故城在廬江縣西春秋時舒國秦為舒邑漢文帝封淮南厲王子賜為廬江王都此今縣西南三十里有大城縣西北金牛山下有金牛城蓋即

古舒縣遺跡也慕家城在廬江縣東二十里世傳  
慕容垂屯兵所築

龍舒城即舒城縣治春秋為羣舒漢置龍舒應劭  
曰龍舒即羣舒之邑杜預曰羣舒偃姓舒庸舒鳩  
之屬今廬江南有舒城舒城西南有龍舒城是也  
舊說以龍舒為廬江地誤也詳見辨訛

高陽城在舒城縣西南二十里高陽氏封其子庭  
堅於舒蓼之間故名

黔布城在舒城縣東晉孝武時於黔布城置南新蔡郡屬南豫州尋廢

羹頡城在舒城縣西北三十里漢高帝七年封兄子信為羹頡侯食邑於舒

亞夫城在舒城縣東南十五里相傳周亞夫嘗領兵至此有東西二城其址尚存

周瑜城在舒城縣西十八里今為淨梵寺

舒鮑城在舒城縣西一百里龍舒水南或以為即

古舒庸也

霍湖城在舒城縣南五里又花家城一名竹里又  
圍箕城俱在縣西十里羊舌城一名陽石又繆家  
城俱在縣西十五里諸城皆南北朝及南宋初戍  
守之所

節城在舒城縣東南十五里亦曹操屯兵所築  
新附城在無為州南十五里吳諸葛恪築以居新  
附之人今其地為新附橋

築王城在巢縣卧牛山之陰書所謂南巢也今為紫微觀

橐臯故城在巢縣西北六十里春秋云哀十二年公會吳於橐臯漢置橐臯縣橐臯亦曰柘臯舊說以為橐訛為柘又譌為柘也按杜預注橐音章夜反是橐字本有柘音非譌也橐臯今為柘臯鎮其東又有會吳城故址

居巢故城在今巢縣東北五里夏商時南巢地周

為巢伯國秦為居巢縣亦曰居鄴今古居巢城陷  
為巢湖

南譙郡城在巢縣東南二十里晉太元中僞置南  
譙郡治山桑縣

九江郡治在無為州襄安鎮秦漢以前江逼城下  
為舟車要衝

潁川故郡在巢縣東南劉宋僞置屬南豫州水經  
注云竇湖水東出為後塘塘上有潁川僞郡故城



襄安舊縣在無為州南四十里襄安鄉西對臨湖  
東下繁昌漢置

臨湖舊縣在無為州西南臨壁山下漢置今為臨  
湖圩

扶陽舊縣在無為州西北接巢縣界晉太元中僑  
置

開城舊縣在無為州西四十里唐武德三年置今  
為開城鎮

無為舊縣在無為州花家疇本巢縣之城口鎮魏武征孫權築城於此攻吳無功因號無為城

蒙古學在無為州今儒學西北大街

吳王宮在廬江縣紫芝坊世傳五代楊行密故宅今為金剛寺

鎮淮樓在府治明郡守龍誥重建有銅壺以核晝夜時刻

五鳳樓在府東城上唐天祐中張崇創築落成之

日有五色鳥集其上因名

九華樓在無為州移風門上宋米芾建江之南九華諸峯屹然相向因以名樓

稻孫樓在無為州大安門上宋米芾秋日登樓燕集見田禾已獲復青問諸老農曰稻孫也芾喜而名其樓又明遠樓在州楚澤門上與羣山相接下臨諸湖米芾題額

講書樓在無為州城隍廟前謝枋得寓於州州人

建此樓居之

聖文祕奉閣在府城宋劉筠知廬州構閣藏真宗  
飛白書及所賜書顏曰聖文祕奉之閣

五雲閣在無為州城內五雲叟陳明所建

聚山閣在無為州治宋朱芾建

景賢亭在府治有晏殊包拯諸公詩刻石甃壁間  
威遠亭在府西城上明熊文舉禦寇駐此又作稅  
于亭於東郊外

仙隱亭在廬江縣水簾洞上宋隆興初建亭以表  
左慈之迹

鵲亭在舒城縣西春秋云昭五年楚伐吳吳人敗  
諸鵲岸杜預曰即舒縣之鵲尾渚亦曰鵲亭

飛霞亭在舒城縣署宋李公寅讀書處其兄伯時  
為畫舊宅圖蘇軾有詩

教弩臺在府城東門內九獅橋北曹操所築教強  
弩以禦吳之舟師

明遠臺在府東北七十里梁縣鄉迴環皆水中有  
一洲方輿覽勝云宋鮑照嘗讀書於此

義門臺在府西十八里唐萬敬儒三世同居親亡  
廬墓宣宗大中間特表其門

節婦臺在府城內惠政橋東南宋包拯舊第節婦  
拯家嗣縶妻崔氏

釣魚臺在廬江縣南八里石磯枕河為左慈垂釣處  
避暑臺在廬江縣東北隅舊傳曹操攻吳避暑休

兵於此今為城隍廟

釣魚臺在無為州東北一名濡須口舊傳浮丘伯釣魚之所

漕臺在無為州城內舊軍學西宋時設漕運司以轉江襄漕事

四望臺在無為州治內宋英宗時知無為軍滿維端建

孔臺在巢縣西蒙臯鎮狀如圓壇可容千人世傳

孔子去楚將適吳駐車於此

懸魚堂在府治西晉羊續為廬江太守有饋生魚者  
意難却之乃曝為乾魚懸於壁上他日復饋續乃  
出所懸魚示之其人慙懼而退後人為建懸魚堂  
三至堂在府治西宋陳堯佐三守是邦故以名堂  
西巖書堂在府東巢湖西岸宋安淮有記

萬卷堂在無為州天慶觀西宋祥符中李景仙藏  
書於此多祕閣所無者以其半進於朝



仰高堂在無為州治東米芾建

三桂堂在無為州宋主之道與兄之義之深同科  
故名其堂曰三桂

馬亮宅在府城和平橋東明改為下察院

包拯宅在府鳳凰橋巷

余闕宅即今合肥縣治明洪武中建恩柱坊尚存  
歸來宅在舒城縣治東宋李公麟歸隱處

亞父故居在巢縣東北二十里亞父山皇覽云吏

民祭亞父於居巢庭上長吏初視事必祭而後從  
政庭中又有亞父井

同食館在府南城上唐元和中刺史路應求建左  
傳云楚人出師自廬以往賑廩同食因以為名後  
又改名建德館

崇明館在廬江舊縣治南數十步宋謝惟士知縣  
事省以拓縣治見碑記後為儒學

璇源館在舒城縣宋元符中李公麟自為記

寶晉齋在無為州治東北宋州守米芾建以晉人  
法書碑刻嵌壁間因名

迴瀾軒在府南門外香花墩有包孝肅換祠軒蓋  
為公設也

青陽山房在府城東六十里巢湖北元余闕讀書  
處

環翠山房在府城南湖右永樂港之原元葛開孫  
隱居講學之所

歐治子鑄劍處在廬江縣東北二十里治父山今  
為寺

毛義隱處在廬江縣東北七十里毛公山有讀書  
洞

梅福真隱處在舒城縣西七十里梅山漢梅福棄  
官隱此地

八公飛昇處在巢縣西蒙臯鄉八公山列仙傳云  
八公白日上昇遺藥在器雞犬皆得仙

花園在府城南二十里元至正間宣讓王遊賞之  
所其址尚存

回車街在巢縣西北十五里兩山夾峙中通一綫  
俗傳孔子於此回車

陰陵道在無為州黃洛河東北即田父給項羽處  
鑊里在巢縣西北濱焦湖吳太平二年孫綝拒諸  
葛誕於壽春大發兵出屯鑊里帝亮責綝留湖中  
不上屯一步者是也

姚萇村在巢縣東新安鄉相傳東晉時姚萇駐師  
屯田於此

春秋山莊在舒城縣春秋山宋李公麟讀書處公  
麟有春秋山莊四時樂詞又有洗硯池亦公麟遺  
蹟

文翁莊在舒城縣南九十里漢文翁嘗讀書於此  
濡須塢在無為州東北五十里一名偃月城吳用  
呂蒙策夾水立城狀如偃月有東西二關其地峻

險東即濡須塢西為巢縣七寶山相對為吳魏相持之所

藏舟浦在府城內古金斗門外昔魏將張遼襲吳藏戰艦於此

箏笛浦在府城后土廟側相傳曹操溺妓舟於此漁人夜聞箏笛聲今猶然也

煉丹池在府城東四頂山上漢人魏伯陽煉丹之所故址尚存

墨池在無為州治宋米芾所鑿蛙聲聒人取片瓦  
濡墨書之投諸池蛙鳴遂絕又大書墨池二字石  
刻今尚存

偃月池在無為州治南每中秋夜月偃半輪故名  
洗耳池在巢縣教場西相傳是許由舊蹟

東興隄在無為州黃洛河吳諸葛恪作大隄築兩  
城使全端留畧守之梁鄱陽王範亦嘗屯兵於此  
三堰在舒城縣南漢羹頡所築詳見碑記此一邑



之水利也

嗟虞墩在府東北八十里世傳項羽於此別虞姬  
香花墩在府城南濠水中蒲葦數里魚鳧上下長  
橋徑度竹樹陰翳舊為包拯讀書處

舒王墩在舒城縣北四十里舊傳漢美頡侯築此  
侯封於舒故謂舒王墩

摩旗墩在舒城縣南十五里世傳漢壽亭侯駐兵  
於此

金雞墩在舒城縣西一里下有金雞潭明秦民悅  
建書院於此

劉郎寨在廬江縣牛欄山自麓至走馬嶺上凡十  
數里寨址寬平可容萬衆險要可守

金華寨在廬江縣黃屯山上勢最險要

安樂柵在無為州東北梁太清末合州刺史鄱陽  
王範屯於濡須遣世子嗣將兵守安樂柵明年嗣  
破侯景將任約於三章遂徙鎮焉亦謂之安樂柵

胡氏曰三章在濡須之東

狀元井在府學宋馬亮擢進士第一故名

瑠璃井在巢縣城北中有四柱色如瑠璃

笑泉在巢縣南七十里聞人笑聲則泉湧沸故名

浮丘釣石在巢縣濡須口水濱一大石上鐫四字

舊傳浮丘釣石

隋碑在巢縣紫微觀開皇十四年造今可見者只

十數字

鳳陽府

西古城在府東十八里舊時軍壘也

魯城在府西魯山之東今有東西魯城村皆以此  
為名一說晉太康五年鍾離移治於此改名魯城  
縣

紫金城在府城外萬壽山前

鍾離城在臨淮縣東四里古鍾離子國春秋時互  
為吳楚邊邑漢置鍾離縣屬九江郡治有東西二

城濠水流於其中名三牛城以郡治有三石牛也  
郡介濠涇間多水災牛土畜故以鎮之

漢下相故城在臨淮縣西北

公路城在臨淮縣舊城東相傳袁術據淮南時所  
築

小東城在臨淮縣東寰宇記云城在東北三里宋  
秦始皇二年築以鎮濠口陳太建五年廢通釋云秦  
始皇築當是秦始皇之訛

樂平舊城在臨淮縣東南本漢縣屬東郡江左僞  
置於鍾離郡界新志云有香城在州東六十里宇  
家莊亦名東鄉城疑是其遺址

趙草城在臨淮縣東距邵陽洲數里梁天監五年  
曹景宗於此築壘俾牧人得過淮北縱芻牧使別  
將趙草守之因以名城

向城在懷遠縣西北四十里渦水之陽春秋云莒  
人入向杜注曰譙國龍亢縣東南有向城漢置向

縣水經注云北淝水經向縣故城南俗謂之圓城  
或謂團城

當塗城在懷遠縣西南二十里古塗山氏國漢置  
當塗縣屬九江郡今為馬頭集水經注云淮水經  
馬頭城北魏馬頭郡治即當塗故城也

平阿故城在懷遠縣西南六十里戰國時齊邑漢  
為縣水經注云淮水北合沙淮西岸有平阿縣  
故城今有平阿集在縣西南平阿山下俗謠為平

義按魏收志云譙州高塘郡有平阿縣在今天長縣及高郵州界蓋梁時僑置於此非故縣也

義成故城在懷遠縣東北十五里漢為侯國水經注云北淝水經義成南世謂之楮城非也其地當渦水入淮處亦名渦口舊縣志云有拖城在縣東北十五里即古渦口城地明一統志謂義成在縣西北四十里誤

龍亢城在懷遠縣西北七十里漢置縣屬沛郡今



為龍亢集

考城在懷遠縣南五十里沈約宋志云盱眙郡有考城縣蕭齊因之魏廢蓋即此

荆山城在懷遠縣北三里亦謂之舊城梁天監中魏人以梁堰淮水命楊大眼鎮荆山因築城置戍焉

邊軍城在懷遠縣西八里宋末江淮安撫使夏貴所築

新城在懷遠縣南四十里宿州北境亦有新城

曲陽城在定遠縣西北九十五里秦置縣應劭曰  
曲陽者在淮曲之陽也後漢以下邳有曲陽改  
曰西曲陽水經注云洛水經淮南曲陽故城又北  
歷秦墟蓋亦當時戍守處也與曲陽相近

陰陵城在定遠縣西北六十里莫邪山南即漢兵  
追項羽失道之所秦置縣後漢為九江郡治

東城在定遠縣東南五十里元和志云項羽敗走

東城即此秦置寰宇記云梁天監間改為定遠

馬丘城在定遠縣西南二十五里即漢志當塗縣  
之馬丘聚也一名藍柵城

芟蒲城在定遠縣西南八十五里芟蒲塘下寰宇  
記云梁魏交併之日魏築為壘亦名定遠城

閭城在定遠縣西北一百十五里相傳魏主燾南  
侵時所築魏收志云楚州有沛郡領蕭相已吾三  
縣蓋即此

柴王城在定遠縣東北七十里大橫山上

羊城在虹縣西北四十里今為湖或曰即相城之訛也相城見宿州

霸王城在虹縣南三十里相傳項羽屯兵處

夏丘城在虹縣東一里寰宇記云堯封禹為夏伯國於此故名漢置縣

僮縣故城在虹縣東北七十里秦縣漢屬臨淮郡明一統志云又有僮都城在縣北一百二十里即

漢取慮縣下蔡城在壽州西北三十里春秋州來邑也吳季札始邑於延陵後邑於此哀二年蔡昭侯自新蔡遷於州來謂之下蔡漢置縣又棟城在下蔡西北花苑城在下蔡城東南五里

安豐城在壽州南八十里按今霍邱縣西南界有魏屬安豐郡故址即漢安風縣也此則晉時僑置者沈約宋志云南豫州安豐郡江左僑立今為安

豐鄉

劉關二城在壽州正陽鎮與潁州接界先主與關羽分城屯軍在此

碣石城在壽州西北二十五里碣石山上兩岸相對淮水經其中相傳大禹所鑿因於山上結二城以防津要三國魏志云甘露元年諸葛誕據壽春司馬昭遣王果軍碣石以逼之梁天監十四年亦築城於此為魏所克

梁城在壽州東北胡三省通鑑注云晉僑立梁郡

於壽春界故有梁城其城在壽陽東北鍾離西南  
青岡城在壽州西二十五里晉謝元等禦秦師時  
築

義昌城在壽州西南永初郡國志云安豐有義昌  
縣晉末嘗立郡

狄城在壽州南梁普通五年裴邃自合肥拔魏狄  
城本傳作狄丘城水經注云肥水經狄丘東石會  
拖水枝津又北至成德是也

黃城在壽州西梁置黃城戍尋置潁川郡於此寰  
宇記云晉義熙十二年置小黃縣在安豐西北三  
十里或即黃城也又西有郭默城相傳晉咸和中  
郭默常屯此陳大建五年吳明徹攻壽陽別將克  
黃城郭默城降是二城相近也

蒼陵城在壽州西北魏收志云壽春縣有蒼陵城  
水經注淮水自潁口左又東經蒼陵北是也

安城故城在壽州南魏志梁置新興郡治安城縣



即此

馬頭戍城在壽州西北二十里淮濱戍守處也梁天監五年取魏合肥魏人守壽陽於馬頭置戍普通五年梁取壽陽亦置於此或以為即馬頭郡誤又馬頭東南有白捺城又南有歐陽城皆梁魏邊戍之地

魚林城在壽州南安豐塘側鴛鴦門又鬪鷄城在州西南三十里

符離城即宿州治故楚邑秦置縣

陽城在宿州南秦置縣陳勝生此

相縣故城在宿州西北相山下春秋時宋邑秦置縣漢為沛郡治今為相城鄉水經注云睢水東逕相縣故城南宋恭公之所都也或譌為襄城

蘄縣故城在宿州南楚邑也秦置縣元和志云宋於此置蕪郡齊以為北蕪郡隋廢郡復為蘄縣又有庸城在蘄西

臨渙城在宿州西南九十里戰國宋銍邑也秦置銍縣梁普通中克魏銍城因置臨渙郡以臨渙水為名今為渙陽鄉

靈壁故城在宿州西北項羽追擊漢軍至靈壁睢水上即此孟康曰靈壁故小縣在彭城南括地志云靈壁故城在符離縣西北九十里

臨潼故城在靈壁縣東北七十里魏置臨潼郡今為董邵集或入虹縣或混為取慮城皆誤

霸王城凡三俱在靈璧縣一縣西南七十里一縣西北七十五里一縣北七十二里皆項羽屯軍之壘

穀陽故城在靈璧縣西南七十五里漢置縣

浚陽故城在靈璧縣南五十里漢侯國東漢為浚縣亦名濠城魏收志云穀陽郡連城縣有濠城即漢浚縣地今為濠城集

仁州故城在靈璧縣東南魏收志云仁州梁武置

治赤坎城領臨潼郡及已吾義城二縣

固賢城在靈壁縣北七十里舊傳為晉錮樂盈地  
後去金為固又有古城在縣西北百里近河岸相  
傳關羽張飛會於此

竹邑縣治在宿州北二十五里漢初置竹縣晉曰  
竺邑今為符離集

廢汴郡在懷遠縣西南魏收志云譙州有汴郡梁  
武置治蕭縣有平阿山其地當在今縣西南與壽

州之廢下蔡縣相近

臨濠郡在定遠縣梁置

陳留故郡在壽州南寰宇記云陳留廢郡在故安  
豐東北五里又浚儀廢縣在縣東北二百五十步  
雍丘廢縣在縣南六十里小黃廢縣在縣西北三  
十里又南有都陸城漢博鄉縣也三國吳朱異留  
輜重於都陸即此

朝歌舊縣在臨淮縣東劉宋置魏收志云縣有九

山城

黃溪水齊周時廢今黃溪在縣東界

灌丘舊縣魏收志云鍾離郡領灌丘縣有劬陽城蓋在今臨淮東北與劬陽洲相近

壽春舊縣即今壽州也戰國末楚考烈王徙都命之日郢秦置縣漢為九江郡治輿地記云壽陽城中有二城一曰相國城宋武帝伐長安時築一曰金城壽陽中城也又州西四十里有壽春故城北

臨淮水相傳考烈王蓋治此又州東有諸葛城相傳諸葛誕所築

成德舊縣在壽州東南漢置水經注云肥水經成德縣故城西又北至芍陂也

崇義舊縣在壽州東南宋志云南梁郡有崇義縣  
羌人所立

肥陵舊縣在壽州東南新唐書志云安豐縣武德七年省肥陵縣入蓋唐初所置也



留丘舊縣在宿州東北六十里漢置

廣平舊縣在宿州西南魏武定六年置

斛城舊縣在宿州東北亦曰朝斛縣魏武定中置  
水經注云淝湖水東至朝斛亭即朝斛之訛也

白禪舊縣在宿州西南七十里隋志云臨渙郡有  
東魏白禪縣新志云有百善集蓋即白禪之謠也

丹城舊縣在宿州西南仁義鄉隋志云臨渙郡有

魏丹城縣

定陶舊縣在宿州定陶山下後魏僑置

新豐舊縣在宿州北七十里魏武定六年置今為  
新豐集

龍山舊縣在宿州西南龍山集寰宇記云在臨渙  
縣西四十五里北齊置

諸陽舊縣在宿州西北唐武德四年分符離縣置  
今州西有諸陽山蓋故縣在此

陽平舊縣在靈璧縣南晉元帝僑置陽平郡於徐

州

連城舊縣在靈璧縣南魏收志云穀陽郡首領連城縣齊周時廢有連城鋪在縣南百里蓋因故縣為名

亳社在宿州相山宋共公都相因置亳社

潛龍殿在臨淮縣開元寺內南唐李昇微時嘗寓寺中故名

南華樓在臨淮縣道遙臺前萬歷中重建有莊周

像

望僊樓在臨淮縣城內相傳藍采和仙去人於此望之因名

清淮樓在臨淮縣舊郡治子城上唐張顛詩云觀魚惠子臺蕪沒夢蝶莊生塚木秋惟有清淮供四望年年依舊背城流

元勳閣在府治西南明為功臣建

含桃閣在臨淮縣舊為郡解西齋宋梅詢為守呂

夷簡為倅晏憇於此

第一山亭在府龍興寺內明洪武十六年建有御書第一山三大字碑

儵然亭在臨淮倅廳子城上舊名觀濶元祐中王雍為郡丞因晉簡文帝儵然臨水便有濠濮間想語乃易今名

四望亭在舊府城唐刺史劉嗣之建李紳記云雲山左右長淮縈帶下繞清淮旁闕城邑紳矮小時

號短李俗呼為短李亭

枕淮亭在舊濠州治子城上宋時建一名望淮  
聖水亭在懷遠縣大禹廟前歲旱禱雨輒應元人  
構亭其上

死虎亭在定遠縣西南水經注云閭潤水西北經  
死虎亭夾橫塘西注宋秦始間殷琰於此築壘拒  
劉勰之兵齊永元二年蕭懿討裴叔業亦屯兵於  
此通典云在壽州東四十里悞也詳見辨訛

對池亭在定遠縣西北七十里相傳宋趙倚所作池即槎枒寺白蓮池

鵲甫亭在定遠縣鵲甫谿水西北流經此亭下

婁亭在虹縣東北左傳云楚人敗徐於婁林杜預注曰僮縣東南有婁亭

鷄備亭在安豐故城西南春秋云昭公二十三年吳敗頓胡沈蔡陳許之師於鷄父杜預注曰安豐南有鷄備亭是也

黎漿亭在壽州東南魏甘露中吳將朱異救諸葛  
誕於壽春進屯黎漿是也水經注云芍陂瀆北分  
為二水一水東注為黎漿水入東經黎漿亭南謂  
黎漿水口

尉武亭在壽州北宋元嘉中劉康祖還守壽陽至  
尉武去壽陽數十里為魏將追及即此

晝涼亭在壽州北五里下有石屋

袁亭在宿州西春秋云桓公十五年公會宋公魏



侯陳侯於袁伐鄭杜預注曰相縣西南有袁亭

芳亭在宿州北即唐咸通中官軍敗賊處又州城  
內有柳溪亭

扶疎亭在宿州北城上宋蘇軾守徐時嘗遺墨竹  
一本於宿宿人鷓石構亭貯焉故名扶疎明弘治  
初州守曾顯庸修復之

張氏園亭在靈壁西鳳山下或曰在鹿鳴門外

附

宋蘇軾張氏園亭記

道京師而東水浮濁流陸走  
黃塵陂山蒼莽行者倦厭凡八

百里始得靈壁張氏之園於汴之陽其外修竹森然以高喬木蒼鬱以深其中因汴之餘沒以為陂池取山之怪石以為巖阜蒲葦蓮芡有江湖之思綺桐檜栢有山林之氣奇花美草有京洛之態華堂厦屋有吳蜀之巧其深可以隱其富可以養其菜蔬可以餉隣里魚蟹蒲筍可以餽四方之賓客余自彭城移守吳興由宋登舟三宿而至其下肩輿叩門見張氏之子碩碩未余文以記之惟張氏世有顯人自其伯父殿中君與其先人通判府君始家靈壁而為此園作蘭皋之亭以養親其後出任於朝名聞一時推其餘力日增治之於今五十餘年矣其木皆十圍崖谷隱然凡園之百物無一不可人意者信其用力之多且久也古之君子不必仕不必不仕必仕則忘其身必不仕則忘其君譬之飲食適於饑飽而已然士罕有蹈義赴節其處者安於故而難出出者狃於利而忘返於是

有違親絕俗之譏懷祿苟安之弊今張氏之先君所以為其子孫之計慮遠且周是故築室藝園於汴泗之間舟車冠蓋之衝凡朝夕之奉燕遊之樂不求而足使其子孫開門而出仕則跬步市朝之上閉門而歸隱則俯仰山林之下於以養生治性行義求志無適而不可故其子孫仕者皆有循吏良能之稱處者皆有節士廉退之行蓋其先君子之澤也余為彭城三年樂其土風將去不忍而彭城之父老亦莫余厭也將買田於泗水之上而老馬南望靈壁雞犬之聲相聞幅巾杖履歲時往來於張氏之園以與其子孫遊將有日矣

觀魚臺在府西七里莊子與惠子觀魚處亦名莊周臺  
觀星堂在府獨山頂上明洪武初建

將臺在府西古城之東

逍遙臺在臨淮縣開元寺後唐刺史梁延嗣累土  
為臺刻莊子像覆以亭

義臺在定遠縣東二十里五代時有梅氏居此宗  
族聚居鳴鼓會食南唐後主築臺表之

判虎臺在定遠縣治宋包拯為令時有虎傷人拯  
移牒於神虎自赴縣繫於臺前石今臺石俱存

春申君臺在壽州城東北隅相傳楚春申黃歇築  
鳳凰臺在壽州南門外

鬪鷄臺在壽州西南三十里明一統志云俗傳二金鷄鬪於此

張飛臺在壽州西陽鎮東南四里

朱家臺在壽州正陽鎮西相傳宋朱芾所築

曬書臺在宿州閔孝鄉閔子墓側

莊子臺在靈璧縣潼山

望荆臺在靈璧縣荆人宦此思親築臺望焉今斷

碑存

吹簫臺在靈璧縣西北七十里

三賢堂在臨淮縣城東北隅宋時建祀彭祖莊子  
惠子明正統二年沒入於淮

威信堂在臨淮縣內宋淳熙時濠帥王回陞辭上  
諭以守邊之道無出威信二字因以名堂

靜正堂在臨淮縣舊郡治堂後又有清風堂皆宋  
時建

薛長卿宅在宿州相城內中元寺長卿初以魯詩

傳龔勝龔舍後為御史大夫東歸沛守遠近尊禮  
殊至郡人以為榮

桓譚藏書處在宿州漢成帝以譚藏書多令待詔  
門下時謂挾桓君山之書富於猗頓之財今蕩花  
墅是也

劉嶽故里在宿州相城澤門內

奕壇在臨淮縣西南二里會仙觀前刻石為棋枰  
傍有二穴可置子

水館在臨淮縣舊濠州治唐張祜有詩又高唐館  
在舊濠州治西

漆園在定遠縣東六十里即莊周為吏處唐天寶  
中尚有漆樹一二十株野火燔燒今為壟畝

國府園在宿州相城北相傳內有宋伯姬黃堂基  
即伯姬焚死處

飲馬池在壽州東南百里相傳漢英布飲馬於此  
留犢池在壽州城西南隅漢時苗來令壽春駕一



特牛至後生犢一及去任曰此淮南所產也留之  
州人遂以名池

惠子窪在臨淮縣治西南三里相傳惠子遊濠上  
時居此

夢蝶坊在臨淮縣開元寺西莊周嘗寓此  
撒金街在臨淮縣內藍采和曳錢仙跡在此

樂安鄉在虹縣廢僮縣界漢匡衡封樂安侯即此  
大澤鄉在宿州西南故蘄縣西水經注云蘄縣有

大澤鄉陳涉起兵於此

睡僊崖在臨淮縣曲陽門外有石崖長二丈餘中  
有一段平坦約六尺世傳有僊嘗卧此

垂花塢在臨淮縣唐刺史獨孤及有詩並序

乘龍洲在臨淮縣東北淮水中流周世宗征濠夜  
遣兵持炬乘橐駝絕淮濠兵驚以為鬼乘龍也

莊眉戍在懷遠縣西北魏置齊建元二年魏人攻  
鍾離徐州刺史崔文仲遣兵渡淮攻破其莊眉戍

是也

禹墟在懷遠縣東南水經注云禹墟在塗山西南  
其地有禹會村即此蘇軾詩曰樵蘇已入黃熊廟  
烏鵲猶明禹會村是也

蒲姑陂在虹縣北左傳云昭公十六年齊伐徐至  
於蒲隧杜預謂取慮縣東有蒲姑陂是也

竹垞在虹縣東北七十里淒河岸

石寨在府萬歲山頂築有石垣

連珠寨在壽州北五里紫金山腰有石甃大路遺址尚存周世宗屯兵處

花靨鎮在壽州西北二十五里相傳以宋武帝女壽陽公主名宋紹興二年廬壽鎮撫使王亨收復安豐軍之花靨鎮蓋州境戍守要地也

趙步在壽州東北淮河北岸水濱泊舟之地以趙氏居此名胡氏曰趙步南直紫金山

曹營在靈璧縣西南一百三十里相傳曹操立營

於此

垓下聚即漢兵圍項羽處漢志云浚縣有垓下聚  
元和志云垓下聚在虹縣西南五十四里蓋在今  
靈璧縣東南

樓子莊在今靈璧縣西三十里

戚家灣在靈璧縣北七十里小河南相傳為漢高  
祖戚夫人之故里

九井在壽州南汲一井則諸井皆動

淬劍泉在府遺碑村相傳莫邪劍成以此水淬之  
楚泉在定遠縣西六十里漢泉在定遠縣西五十  
里源出楚泉二泉並行自南而西合流入洛達於  
淮

珍珠泉鳳臺縣城北五里聞人聲則泉迸如珠一  
名咄泉非有二泉也

盤屋槃在府治南山中占槃也

行色詩石刻在壽州舊安豐縣宋待制司馬池嘗

監酒稅作行色詩後孫宏為之刻石

漢碑在宿州相祠內八分體所謂三百有五碑也  
又有宋宣和封崇惠侯勅碑亦在祠內

解帶石在臨淮縣清流門外俗傳項羽解帶飲石  
上即此

啓母石在懷遠縣禹廟西石形如老嫗

秦橋山石在虹縣城東陡門山產美石宋都汴時  
采石於此

宣和石在靈璧縣西二十里外沿途多奇石

魏昌城在壽州八公山東南魏延昌初梁作淮堰揚州水漲刺史李崇更起此城以備水州人號曰魏昌城寰宇記云有石城在縣北四里即此



江南通志卷三十五